

आकाशवाणी जयपुर-अजमेर

प्रादेशिक समाचार

दिनांक 08.06.2024

समय: 18.45 बजे

- राष्ट्रपति द्रौपदी मुर्मू काल एनडीए गठबंधन रा नेता नरेन्द्र मोदी ने प्रधानमंत्री ओहदा री शपथ दिरावेला ।
- राष्ट्रपति भवन मांय शपथ लेवण रा जळसा री तैयारियां जारी-पड़ौसी देशां अर हिंद महासागर हलका रा देशां रा नेता जळसा मांय खास पावणा रा तौर ऊं शामिल व्हेला ।
- राज्यपाल कलराज मिश्र 'विकसित भारत 2047' सारू नौजवानां ऊं महती भूमिका निभावण बाबत् कह्यो ।
- मौसम विभाग आज जोधपुर, बीकानेर, अजमेर अर जयपुर संभाग रा कुछ हलकां मांय अंधड़ आवण अर बिरखा व्हेवण रा आसार जताया ।

000

केंद्र मांय नुवी सरकार बणावण री तैयारियां जोर-शोर ऊं चाल रही है । राष्ट्रपति द्रौपदी मुर्मू एनडीए संसदीय दल रा नेता नरेन्द्र मोदी ने सरकार बणावण सारू न्यौतो दीनो है । शपथ लेवण रो जळसो काल सिंज्यां सवा 7 बज्यां राष्ट्रपति भवन मांय व्हेला । राष्ट्रपति द्रौपदी मुर्मू नरेन्द्र मोदी अर वां री मंत्री परिषद रा सदस्यां ने पद अर गोपनीयता री शपथ दिरावेला । शपथग्रहण समारोह रो आकाशवाणी ऊं सीधो प्रसारण कर्यो जावेला ।

नरेन्द्र मोदी रे लगातार तीजी दफा प्रधानमंत्री ओहदा री शपथ लेवण रा जळसा मांय सिरकत करण सारू पड़ौसी देशां रा नेतावां ने न्यौतो दियो ज्यो है । विदेश मंत्रालय रे मुजब श्रीलंका रा राष्ट्रपति रानिल विक्रमसिंघे, मालदीव रा राष्ट्रपति डॉ. मोहम्मद मुइज्जू, सेशेल्स रा उपराष्ट्रपति अहमद अफीफ अर बांग्लादेश री प्रधानमंत्री शेख हसीना, मॉरीशस रा प्रधानमंत्री

प्रविंद कुमार जगनौथ, नेपाल रा प्रधानमंत्री पुष्प कमल दहल 'प्रचंड' अर भूटान रा प्रधानमंत्री शेरिंग तोबगे शपथ ग्रहण समारोह मांय सिरकत करेला ।

000

कांग्रेस कार्यसमिति एक राय ऊं प्रस्ताव पास कर र पार्टी रा नेता राहुल गांधी ऊं लोकसभा मांय विपख रा नेता री भूमिका निभावण री अरज कीनी है। कांग्रेस रा आला नेता के. सी. वेणुगोपाल कार्यसमिति री मीटिंग पाछे खबरनवीसां ने आ जाणकारी दीनी। मीटिंग मांय कांग्रेस रा अध्यक्ष मल्लिकार्जुन खड़गे पार्टी रा सगळा नुवा चुणी ज्या सांसदां ने विपरीत हालात मांय जीत हासिल करण सारू बधाई दीनी। वे कहयो के कांग्रेस पार्टी ने लोकतंत्र अर संविधान बचावण सारू देशभर मांय जोरदार समर्थन मिल्यो। खड़गे कहयो के पार्टी इंडिया गठबंधन री पार्टियां सागे संसद मांय अर बाहर मिल र काम करेला।

000

मुख्यमंत्री भजन लाल शर्मा आला अहलकारां सागे मीटिंग ले र राज्य सरकार री नौकरियां मांय भर्ती रा काम रो जायजो लीनो। मीटिंग मांय मुख्यमंत्री कहयो के 'सशक्त युवा, समृद्ध राजस्थान' रा संकल्प सागे वां रा राज मांय पूरी साफगोई सागे भर्तियां करी जा रही है, जिण ऊं नौजवाना रा सपना पूरा व्हे रह्या है।

000

राष्ट्रीय परीक्षा एजेंसी-एनटीए कहयो है के राष्ट्रीय पात्रता सह प्रवेश परीक्षा-नीट अंडर ग्रेजुएट 2024 देश भर मांय पूरी साफगोई सागे करायी ज्यी है। एनटीए रा महानिदेशक सुबोध कुमार सिंह आज नई दिल्ली मांय खबरनवीसां सागे बातचीत करता थकां कहयो के ई परीक्षा रो कोई पर्चो लीक नी व्हयो है। वे कहयो के ओ मुद्दो नीट परीक्षा रा वां छह केंद्रां रा एक हजार छह सौ परीक्षार्थियां ऊं जुड्यो है, ज्यां रो टेम गलत पेपर बंट जावण रे कारण खराब व्हे ग्यो हो। सिंह कहयो के एनटीए आं विद्यार्थियां री शिकायतां री जांच सारू आला दर्जा री समिति बणायी ही।

आं परीक्षा ई साल पांच मई ने करायी ज्यी है अर 4 जून ने इण रा नतीजां रो ऐलाण करी ज्यो हो।

000

राज्यपाल अर विश्वविद्यालयां रा कुलाधिपति कलराज मिश्र विद्यार्थियां ऊं खेती बाडी ऊं जुडी भणार्ई—लिखाई किसानां अर कृषि अर्थव्यवस्था रे मार्फत देश ने मजबूत बणावण सारू काम करण बाबत् कह्यो है। राज्यपाल आज जोधपुर मांय कृषि विश्वविद्यालय रा दीक्षान्त समारोह मांय बोल रह्या हा। वे 'विकसित भारत 2047' सारू नौजवानां ने खास भूमिका निभावण बाबत् कह्यो। राज्यपाल कह्यो के कृषि विज्ञान केन्द्रां ने हर एक जणा ने खेती बाडी रा विकास ऊं जुडी नुवी जाणकारियां मुहैया करावणी चाहिजे। राज्यपाल स्नातक रा 165, स्नातकोत्तर रा 18, पीएचडी रा 3 विद्यार्थियां ने उपाधियां दीनी अर सब ऊं बत्ता नम्बर लावण वाळा 8 विद्यार्थियां ने सोना रा तमगा दे र नवाजा।

000

शिक्षा मंत्री मदन दिलावर आज कोटा रा रामगंजमंडी कने सुकेत मांय जनसुणवाई कीनी। वे जनता री समस्यावां सुण र अहलकारां ने निपटारा रा हुकम दीना। शिक्षा मंत्री सातलखेडी मांय राख्यी ज्यी लारली जनसुणवाई रे दौरान आया मामलां रा निपटारा री प्रगति री जाणकारी ई लीनी।

000

कृषि अर उद्यानिकी विभाग रा प्रमुख शासन सचिव वैभव गालरिया अहलकारां ऊं ईमानदारी अर कर्तव्यनिष्ठा सागे टेमसर काम करण बाबत् कह्यो है। गालरिया आज जयपुर रा पंत कृषि भवन मांय अहलकारां री मीटिंग मांय बोल रह्या हा। वे अहलकारां ऊं किसानां ने सरकारी योजनावां रो बत्तो ऊं बत्तो फायदो दिरावण सारू कह्यो।

000

चित्तौड़गढ़ रा जिला कलेक्टर आलोक रंजन आज रावतभाटा उपखंड रा थमलाव मांय मनरेगा रा तैत तळाई बणावण रा काम रो जायजो लीनो। वे मजूरां ऊं बातचीत कर र न्यारा—न्यारा सुबीतां अर काम रा बारा मांय जाणकारी लीनी। कलेक्टर अहलकारां ने कमठाणा माथे छाया अर पीवण रा पाणी समेत न्यारा—न्यारा सुबीता मुहैया करावण रा हुकम दीना। जिला कलेक्टर काल रावतभाटा उपखण्ड री ग्राम पंचायत झालर बावड़ी मांय रात्रि चौपाल लगा र जनता री समस्यावां सुणी अर वां ने दूर करण सारू अहलकारां ने ज़रूरी हुकम दीना।

000

जैसलमेर ज़िला रा गांवांई हलकां मांय पाणी, बिजली, मौसमी बीमारियां अर ढांढां री कर्रा बीमारी समेत न्यारा—न्यारा मुद्दां ऊं जुड़ी परेशानियां री ठा करण सारू 21 अहलकार 63 ग्राम पंचायतां रो दौरा कीनो। वे जनता अर वां रा नुमाइन्दां ऊं न्यारी—न्यारी जाणकारियां लीनी।

000

राज्यपाल कलराज मिश्र काल वीर शिरोमणि महाराणा प्रताप री जयन्ती रे मौके जनता ने शुभकामनावां दीनी है। वे कह्यो के मेवाड़ री आज़ादी सारू करी ज्यो वां रो संघर्ष देश रा मान ऊं जुड़्यो हो। राज्यपाल महाराणा प्रताप रा आदर्शां ऊं सीख ले र मज़बूत भारत बणावण सारू काम काम करण बाबत कह्यो। महाराणा प्रताप री जयंती रे मौके प्रदेश मांय न्यारा—न्यारा कार्यक्रम राख्यी ज्यो। केकड़ी मांय खूनदान शिविर लगा र 195 यूनिट खून भेळो करी ज्यो।

000

विश्व रक्तदाता दिवस रा सिलसिला मांय अजमेर रा जवाहर लाल नेहरू अस्पताल मांय आज सात दिन रो खास कार्यक्रम सरू करी ज्यो। इण री सरूआत मांय कैजुअल्टी वार्ड मांय खून री मुफ्त जांच रो शिविर लगायी ज्यो। शिविर मांय आया लोगां री ब्लड ग्रुप अर हीमोग्लोबिन री मुफ्त जांच कर र ज़रूरी राय दीरीजी अर दवाइयां मुहैया करायी ज्यी।

000

राज्य रा शहरी अर गांवांई स्थानीय निकायां मांय 31 दिसम्बर 2023 तांई रीता व्ह्या ओहदा माथे उपचुनाव करावण सारू राज्य निर्वाचन आयोग कार्यक्रम जारी कर दीनो है। ई सागे ई चुणाव वाळा हलकां मांय आदर्श आचार संहिता लागू व्हे गयी है। सदस्य ओहदा सारू 14 जून ने लोक सूचना जारी करी जावेला अर 18 जून तांई कार्य दिवस मांय संवारे साढे 10 ऊं दोपहरां पाछे 3 बज्यां तांई नाम पाना दाखिल कर्या जा सकेला। 19 जून ने पर्चा री जांच करी जावेला अर 21 जून सिंज्या तीन बज्यां तांई नाम पाछा लिया जा सकेला। 30 जून ने संवारे 7 ऊं सिंज्यां 5 बज्यां तांई वोट पडेला अर 1 जुलाई ने संवारे 9 बज्यां ऊं वोटों री गिणती करी जावेला।

000

21 जून ने मनाया जावण वाळा अंतराष्ट्रीय योग दिवस रा सिलसिला मांय प्रदेश मांय न्यारा-न्यारा कार्यक्रम राख्या जा रह्या है। पाली जिला रा देसूरी हलका मांय महिलावां ने मजबूत बणावण सारू **सशक्तिकरण के लिए योग** थीम सागे ब्लॉक लेवल माथे योगाभ्यास कार्यक्रम सरू करी ज्यो। इण मांय मोटी तादाद मांय गांवांई हलकां री महिलावां सिरकत कीनी।

000

मौसम विभाग आज जोधपुर, बीकानेर, अजमेर अर जयपुर संभाग रा कुछ हलकां मांय बादळां री गाज सागे आंधी चालण अर बिरखा व्हेवण रा आसार जताया है। राज्य रा आतूणी हलकां मांय ई अंधड़ सागे कठे कठे बिरखा व्हेवण, बीजळी पड़बा अर ओला पड़बा रा आसार है। मौसम विभाग आवता दिनां घणी ज़ोरदार लू बाजण सारू चेतायो है। **शाहपुरा** मांय कठे-कठे बिरखा व्ही। **भीलवाड़ा** रा माण्डल हलका मांय हल्की बिरखा व्ही। **भरतपुर** ज़िला रा राह मांय दोपहरां री बगत चाली आंधी अर बिरखा ऊं केई रूखड़ा अर होर्डिंग्स पड़ ग्या। दूजी कानी **जैसलमेर** ज़िला मांय आंधी रे कारण पोकरण मांय बिजली रा टेशन री 132 के.वी. री पावर लाइन रा खंभा पड़ जावण ऊं बिजली बंद व्हे गयी। ई कारण

जिला रा 184 अर बाङमेर जिला रा 10 गांवां माथे असर पड्यो। **बालोतरा** शहर मांय पाणी री पूर्ति माथे 3 ऊं 5 दिन तांई असर रेहवण री शंका है। **उदयपुर** मांय सिंज्यां री पोर बिरखा व्ही। **हनुमानगढ़** मांय ई आखा दिन बादळा मंड्या रह्या। जन स्वास्थ्य अभियांत्रिकी विभाग रा एस.ई. बाबूलाल मीणा बतायो के ई दौरान जनता ने टैंकरां रे जरिये पीवण रो पाणी मुहैया करायो जावेला। **झालावाड़** जिला मांय तेज गर्मी अर उमस ऊं परेशानी व्ही। **करौली** मांय ई जोरदार गर्मी ऊं जनता परेशान रही।